

زينب اتحشم وليها وتنتخي
يا أبو جفوف الكطيعه ضيعتني والله ضيعه

من تهاوى علمنه وطحت علمشرعه
انفجع دلالي خويه وتهامى مدمعه
وشفت چفينك اعلى الثرى متكطعه
وگلت أحوالي بعدك يحسره امضيّعه
رحل حمای الحمه غارگ ابفيض الدمه

واويلاه واويلاه واويلاه يعباس

يا كفيل اللي بيا تعهد والتزم
من بعدكم ترى حاييره بأمر الحرم
إنهض وصد الينا يشيال العلم
ولامعين اليراعينه ابهاي الخيم
گوم ياراعي اللوا گلبي بالهم انچوى

واويلاه واويلاه واويلاه يعباس

ماني اختك يخويه الحديد بناگتي
وانا افديچ يحوره ابروحي ومهجتي
وگلت ليّا يزيب تعالي بذمتي
ما تذلين ابد هذا عهد برگبتي
وين وعدك يا شهم أنشدك والله بألم

واويلاه واويلاه واويلاه يعباس

وهذا صيواني ياخويه بيدك تنصبه
شلون تاليها وحدي أظل امغرّبه
وتحرسه ابعينك ولا أحد يتگرّبه
وبعد عينك تجي هالأعادي وتسلبه
شلون ضعت ابكربله؟ مو أني لمدلله

واويلاه واويلاه واويلاه يعباس

چنت بيكم عزيزه يحمای الدخيل
اسمع امعائب ايتامي والحن والعويل
وتالي اصبح غريبه ودمع عيني يسيل
تنادي وينه أبو الغيره عباس الكفيل
عجب يتركنه ويروح ويشعب الغلب بجروح

واويلاه واويلاه واويلاه يعباس

جاها لجواب يزنب فرى روي العتاب لا تفجعيني يختي وتزيدني المصاب
بالله عذريني جسمي رميه اعلى التراب والسهم ناشب ابعيني ودمومي خصاب

راسي مفضوخ ابعمد وگلبی بالهم انمرد
عذريني عذريني عذريني يزنب

گطعوا اشمالي يا زينب وگطعوا اليمين وهالاعادي عليه صفوا متجمعين
ايسي مني يختي ولا تترگين ويصعب اعليه امرج بيت ليث العرين

كافلج فوك الثرى اصبري يمخدره
عذريني عذريني عذريني يزنب

شلون انهض يحوره وللخيمه اعود وانه مصيوب ومگطوعه مني هالزنود
چفوفي مبريه ومزقوا وسفه الجود وهامي ينزف يمحزونه من ضرب العمود

طير مكسور الجناح وبيا تلاهب جراح
عذريني عذريني عذريني يزنب

دمومي تهمي جرّيه ولا ليا جلد راح عنج يحوره الحمى وغاب السند
والوعد لا تذكريني يختي بالوعد بالله عذريني دلالي بالحسره انمرد

وين ابو سکنه العطوف يراف بحالي ويشوف
عذريني عذريني عذريني يزنب

سامحيني يزنب بيت خير العمل وگولي الخيي بو سکنه يحضر بلعجل
ارّد اودعه يوسفه گيل ساع الاجل وارّد اخبره السهم بيه يا حوره اشعمل

وهذا يحوره الوداع اصرخ ابهم وافتجاع
عذريني عذريني عذريني يزنب

زينب اتحشم وليها وتنتخي
يا ابو چفوف القطيعه ضيعتني والله ضيعه